

Дивен Бог во святых Своих, Бог Израиля



Акафист святой первомученице равноапостольной ФЕКЛЕ

Сестринская община во имя святой первомученицы Феклы
при храме Успения Божией Матери
село СЕНИНО, Козельской епархии,
Калужской митрополии
2014 от Р.Х.



Кондак 1

Избранную Христом невесту богозванную, святого Павла ученицу верную и мудрую, земного жениха и мир презревшую и в подвизех пресветло просиявшую, ты, Фекло, мученице первая, восхвалим. Ты же, яко у Бога дерзновение обретшая, от пагубы страстей и бед покрый зовущих ти:

Радуйся, невесто Христова, Фекло первострадальная.

Икос 1

Ангели на Небесех удивишася, узревше души твоя сила и произволение: мужескими бо труды врага посрамивши, ты, агниц чистых священная похвало, первая в свещеноснем их сонме достигла еси Чертога Превечнаго Жениха, идеже ныне ублажаема тако:

Радуйся, красото мучеников;

радуйся, радование дев и жен.

Радуйся, первых пустынножителей образе:

радуйся, подвижников благочестия правило.

Радуйся, Апостола верховнаго дщи предобрая;

радуйся, мати иночествующих преславная.

Радуйся, жениха земнаго добре бежавшая;

радуйся, к Жениху Небесному прекрасно притекшая.

Радуйся, агнице Христова пренепорочная;

радуйся, свеще Господня светлосиянная.

Радуйся, еюже вернии утверждаются;

радуйся, еюже сопротивнии низлагаются.

Радуйся, невесто Христова, Фекло первострадальная.

Кондак 2

Видящи умными очима твоими, Фекло, свет любви Божия в души твоей, егда стрелами благовестия, от честных уст Павловых испущенными, сладце уязвися, за ны Распятому возвала еси: Аллилуиа.

Икос 2

Разум Небесных таин даровася ти, Феоклии отрасли, Фекло прехвальная, егда вслед Христа устремившись, презрела еси доброту лица твоего, паче же лепоту юности. Темже мы, чтуще тя, яко вертоград чистоты, приносим ти пение таковое:

Радуйся, украшение чистых дев;

радуйся, печате лика апостолов.

Радуйся, разума духовнаго светильниче;

радуйся, подвига страдальческаго краю.

Радуйся, мечу, стремления страстей посецай;

радуйся, путью, в Небесный Град востекай.

Радуйся, сподвижнице мужей апостольских;

радуйся, ветве и рождие Лозы, Христа.

Радуйся, свещнице трезвения и мудрости;

радуйся, огню духовныя любви.

Радуйся, грозо на ярость вражию;

радуйся, молнии на сопротивнаго.

Радуйся, невесто Христова, Фекло первострадальная.

Кондак 3

Силою Вышняго осеняема и Духом Божиим напаяема, Фекло, благодати росу в сердце твоём собравши, живоносный кладезь показала еси, исполнь даров Утешителя, источай же словеса от Слова Превечнаго, имиже орошаемии славят Святую Троицу: Аллилуиа.

Икос 3

Имущи, дево, сердце, возжженное пламенем любви Жениха твоего, Христа, обручника своего Фамира абие отеклася еси, жития равноангельнаго возжелевши и вся, яже суть в мире, во уметы вменивши, якоже Павел тебе образ подражания подаде. Сему дивящеся, тако ты величаем:

- Р**адуйся, щите воздержания;
- радуйся, двере благочестия.
- Р**адуйся, мрак страстей на земли разгнавшая;
- радуйся, богатство на Небесей стяжавшая.
- Р**адуйся, храме священства световиднейший;
- радуйся, скйние жития добронравнаго.
- Р**адуйся, яко словом твоим сердца утучняются;
- радуйся, яко тобою потоцы греховнии изсушаются.
- Р**адуйся, упование кротких агниц;
- радуйся, венче преподобных дев.
- Р**адуйся, источниче струй благодатных;
- радуйся, верте цветосаждений Райских.
- Р**адуйся, невесто Христова, Фекло первострадающая.

Кондак 4

Буря тягостных искушений возста на храм души твоея, о Фекло мужемудренная; ты же, ревность имущи Божественную, от Павла уведевши во узилище о Камени краеугольном, Христе, на Онаго исповедании утвердила еси скинию сердца, в нейже воспела еси: Аллилуиа.

Икос 4

Слушаючи отца твоего по духу, Павла апостола, сподобилася еси во образе того узрети укрепляющего тебе Христа, Егоже волею пламень ты яко чертог окружи, егда введена бысть во огонь велий; и облак, воды и града исполнь, излился. Чудо же сие ведяще, научаемся ти звати, добропобедная Фекло, сице:

- Р**адуйся, нравов благих сокровищнице;
- радуйся, Истины первосвидетельнице.
- Р**адуйся, богатство целомудрия неоскудное;
- радуйся, страже Иконии неусыпай.
- Р**адуйся, яко тобою Христос возвеличился;
- радуйся, яко тобою враг посрамился.
- Р**адуйся, столпе чистоты, до Небес досязая;
- радуйся, свете любви, вся концы просвещая.
- Р**адуйся, копие, закалающее всякую страсть;
- радуйся, рекб, орошающая землю душ.
- Р**адуйся, гласе Премудрости;
- радуйся, изобильный кладезю милости.
- Р**адуйся, невесто Христова, Фекло первострадающая.

Кондак 5

Боготечною звездою темный мир осияла еси, о первая страсотерпице Фекло, яко адамант явльшиися во страданиях многих и образ бывши добраго исповедания. Тобою бо луча Солнца Правды, Христа, возсия, ночь греха разгоняющая и пети с тобою Тому воздвигающая: Аллилуиа.

Икос 5

Видев благолепие лица твоего, о Фекло, Александр зверонравный на честь твою посягнути умысли; ты же, девство твое положивши хранити, исповедала еси обручение свое Христу. Того ради, мужество твое поминающе, тако песньми немолчно тя ублажаем:

- Р**адуйся, луче славных победоносцев;
- радуйся, крепкая поборнице исповедниц.
- Р**адуйся, дохновения Свыше мироположнице;
- радуйся, Царства Святыя Троицы украшение.
- Р**адуйся, девство твое, яко дар, Христу принесшая;
- радуйся, сосуд освящен Духа Святаго явльшаяся.
- Р**адуйся, злых человек поправшая лесть;
- радуйся, Живодавца привлекшая благодать.
- Р**адуйся, знамение любви Творца;
- радуйся, возбранение беззакония.
- Р**адуйся, правило доблемышленных жен;
- радуйся, образе мужественнаго дерзновения.
- Р**адуйся, невесто Христова, Фекло первострадальная.

Кондак 6

Проповедницу славы Триединого Бога себе показала есе, о Фекло прехвальная, егда силу богоборца, иже во Антиохии, богоугодным противлением победила еси. Зверем же дивиим бывши предана на снадение, неврежденна сохранилася силою Жениха твоего; Емуже, краснейшему паче всех человек, воспела еси: Аллилуиа.

Икос 6

Возсиявый в сердце твоем Христос, Свет Истинный, богодейственною десницею Своею ярость зверей устави; и паки, тебе наутрие вданней львом и медведем, нрав их на тихость и целомудрие преложи, львицу же защищати тя, дево чистая, научи. Вси зрящии о сем ужасохуся; мы же, вернии, вопием ти:

- Р**адуйся, Истины благовестие;
- радуйся, богословия уста.
- Р**адуйся, ластовице, взлетевшая от деяния к созерцанию;
- радуйся, соловей, вдохновленный наитием Духа.
- Р**адуйся, цветоплетенный подвижников венче;
- радуйся, преизобильный учений поточе.
- Р**адуйся, яко уста зверей затворяеши;
- радуйся, яко Горнюю Скинию украшаеши.
- Р**адуйся, утверждение Вышня светлости;
- радуйся, основание твердаго благочестия.
- Р**адуйся, светлаго чертога наследнице;
- радуйся, крина чистоты насадительнице.
- Р**адуйся, невесто Христова, Фекло первострадальная.

Кондак 7

Хотящи Трифену вдовицу в вере наставити, той слово Жизни благовествовала еси, она же, о воскресении мертвых уведевши, молитв испроси о усопшей дочери своей. И абие ты пламенне возопила еси: Иисусе мой, Сыне Вышняго, помяни душу преставльшияся Фалконйиллы, да воспоет Тебе выну песнь на земли живых: Аллилуиа.

Икос 7

Новое чудо смотрения Своего яви Господь, егда жены богомудрыя ввергоша во озеро со зверьми благовонныя нард, амом и касию, во образ мира благоуханнаго, имже запечатлесе баня пакирождения твоего. Тогда бо облак огненный тело твое сокры, гады же оныя умертви, во еже взывати всем:

- Р**адуйся, Иисусово многоценное миро;
- радуйся, Утешителев несокрушимый сосуде.
- Р**адуйся, невещественных Ангелов общнице;
- радуйся, подвизающимся человеком наставнице.
- Р**адуйся, вышото добродетелей пренебесных;
- радуйся, разума глубино дев премудрых.
- Р**адуйся, богомыслием себе укрепившая;
- радуйся, благодатию звери лютыя укротившая.
- Р**адуйся, душетленных страстей истребление;
- радуйся, нравов благих насаждение.
- Р**адуйся, за немощствующих к Богу ходатайство;
- радуйся, во искушениях сущих предстательство.
- Р**адуйся, невесто Христова, Фекло первострадальная.

Кондак 8

Странное чудо, дево богохраняемая, мучителие твой и людие вси узреша, егда привязанней ти разъяренным тельцем, оных свирепая устремления укротишася, на тебе почивающею Божию благодатию, еяже действием уверовавшии воспеша вся содержащему в длани Своей Творцу: Аллилуиа.

Икос 8

Вся осиянна была еси светом Фаворским, Фекло, Сияния Отча святая избраннице; темже убо безлунный мрак идолобесия, безбожия же и упорства иудейскаго расточила еси, концы вся просвещающи и наставляющи вопйти тебе сице:

- Р**адуйся, буесловных падение;
- радуйся, безмолвствующих умудрение.
- Р**адуйся, Света немерцающаго причастнице;
- радуйся, радости неотъемлемая тайнице.
- Р**адуйся, диадимо достойных жен;
- радуйся, тайнозрительнице славы дев.
- Р**адуйся, кивоте Божиих даров;
- радуйся, ковчеже благ Небесных.
- Р**адуйся, горлице чистая и нескверная;
- радуйся, светило девства и целомудрия.
- Р**адуйся, звездо умнаго благомощия;
- радуйся, цельбо душевнаго нерадения.
- Р**адуйся, невесто Христова, Фекло первострадальная.

Кондак 9

Всякое естество Ангельское возрадовался о человецех, уверовати имущих, егда ты, Фекло богопросвещенная, благодати и силы Духа Свята исполненная, Павла великаго благим повелением возвратилася еси в землю отечества твоего, научаючи пети немолчно Христу: Аллилуиа.

Икос 9

Ветии многовещаннии никакоже могут по достоянию восхвалити дела твоя, Фекло: ты бо Трифене, во Евангелие уверовавшей, высокий образ любве показала еси, ту научивши богатство свое расточити болящим, сиротам, убогим и неимущим, иже, приявше даяния, абие тепле воззваша:

Радуйся, алчущих изобилие;

радуйся, злоскорбящих веселие.

Радуйся, богатство жития светоявленного;

радуйся, главизно воспитания богоугоднаго.

Радуйся, манно с Небесе, насытившая нищия;

радуйся, райский нектаре, возставляй падшия.

Радуйся, напаяющая таинственными орошеньми;

радуйся, просвещающая Божественными озареньми.

Радуйся, агнице, Пастырем знаменованная;

радуйся, дево мудрая, Царем избранная.

Радуйся, дерзновения о Христе одеяние златошвенное;

радуйся, Евангельския любве излияние светлоструйное.

Радуйся, невесто Христова, Фекло первострадальная.

Кондак 10

Спасти хотя чрез тебе человек множество, путеводительным облаком приведе тя Господь в пещеру Селевкийския горы Каламон, идеже пребывати тебе, подвижнице, указа; ты же тамо постом, бдением и молитвою неисчетная искушения препобедивши, воспела еси Дивному во святых Своих: Аллилуиа.

Икос 10

Стена и град тверд еси, добродеево, всем призывающим тя христианом, тебе бо благодатию Вышняго дадеся сила творити многоразличная чудеса: расслабленныя укрепляти, слепым очеса отверзати, демонов от беснующихся отгоняти; сего ради зрящии знамения сия зываху:

Радуйся, чудес неисчерпаемая пучино;

радуйся, даров звездосиятельная тверде.

Радуйся, нечистых духов изгнание;

радуйся, расслабленных возставление.

Радуйся, кормило верное силы душевныя;

радуйся, фиале златый молитвы умносердечныя.

Радуйся, яко люте страждущих гласы слышиши;

радуйся, яко сущим в бедах предстательство показуеши.

Радуйся, еюже древний змий попирается;

радуйся, еюже прелесть обличается.

Радуйся, изсушение плоти угодное;

радуйся, утучнение нивы Евангельския.

Радуйся, невесто Христова, Фекло первострадальная.

Кондак 11

Пение ти богокрасное подобает, о Фекло, воистинну ревнительнице Апостолов сущей: ты бо тех стезям последовала еси на земли и многия люди, в сени смертной сидящая, благовестием Жизни Вечныя огласивши, научила еси Христу, Востоку востоков, взывати: Аллилуиа.

Икос 11

Светоприемную свещу святого девства твоего негасиму, о Фекло, сохрани ищущи от злобы безстуднейшаго умышления, умолила еси Творца, да разсечется скала, во образ Богозданныя раки телу твоему, облеченному снегосветлою милотию чистоты. Сие чудо воспоминающе, ты верою славим:

Радуйся, Церкви Христовы каменю;
радуйся, низпровержение безбожия.
Радуйся, основание благочестия неколеблемое;
радуйся, милоте целомудрия нерастерзная.
Радуйся, яко тобою уязвися человек враг;
радуйся, яко тобою побежден бысть лукавый;
Радуйся, вскрай моря жития небурное пристанище;
радуйся, по оному пловцем огню путеводительный.
Радуйся, Небеснаго невестника преддверие;
радуйся, райския пищи предвкушение.
Радуйся, Богосажденного Едема сладосте;
радуйся, забвение мирския горечи.
Радуйся, невесто Христова, Фекло первострадальная.

Кондак 12

Благодатию Нетлэннаго Жениха твоего, от Гроба, иже бе в камени, тридневно возставшаго, боголепный твой образ предивно камень сокры, да смотрением Божиим утаится до времени дарованный Церкви светильник святятыя любви, еюже воскриляеми, Херувими присно поют: Аллилуиа.

Икос 12

Поюще тебе, о Фекло прехвальная, песнь, ейже достояше бы от Ангелов приноситься, величаем твои подвиги, почитаем твоих страданий множество, хвалим доблее твое о Господе свидетельство, ублажаем же болезни и труды апостольския и дивимся силе еже ко Христу рачения твоего, имже и нас восперяеши ти восклицати:

Радуйся, крепосте иноков;
радуйся, сило проповедников.
Радуйся, многоплетенных посещение грехов;
радуйся, многообразных добродетелей воня.
Радуйся, крепосте иноков;
радуйся, сило проповедников.
Радуйся, многоплетенных посещение грехов;
радуйся, многообразных добродетелей воня.
Радуйся, доброто всех родов;
радуйся, душ наших радости.
Радуйся, невесто Христова, Фекло первострадальная.

Кондак 13

О всечестная первомученице Фекло, святым апостолом равная! Нынешнее наше приими приношение и богоприятным твоим ходатайством укрепи нас в добром подвиге веры, милосердия и целомудрия, да с тобою в Жизни нескончаемой воспеваем Жизнодавцу Господу: Аллилуиа (*трижды*).

(Сей кондак глаголи трижды. По сем — икос 1 и кондак 1).

Молитва первая

О райский цвете целомудрия, о мученице первейшая Завета Новаго, о Фекло, невесто Христова равноангельная, страдания очищенная и проповедию апостольскою напоенная, чистоты крине осиянный, подвиги многими процветый и чудеса преславными облагоухай!

Кому уподобим тебе, богозванная, всякое душепагубное прельщение поправшая, Духа Святаго исплнь сосуде, премудрости кладезю, цельбы источнице, иже всякия страсти пламень остужаяй! Яко облак светлый, прииди и омой нас дождем молитвы твоея от скверн душевных и телесных. Якоже огонь любви разжженный, уцеломудри сердца наша и воспламени я ко Христу любовью. Яко знамение мужества в страданиях непреклоннаго, укрепи колеблемая сердца наша спасительною силою Креста Господня; яко крепкая поборнице наша противу выну враждующих на ны, немощных, буди нам щит огнезранный неборим, да бежат от нас безстуднии демони, опаляемии твоими молитвами, да тела наша яко храмы Святаго Духа будут.

Ей, Фекло, добродеево премудрая, отврати очи наша от похотей мира сего, да обручимся Христу непорочно совестию; исполни светильницы наша елеом целомудрия, зане тяжце согрешили есмы, верности Жениху Христу не сохранивши, и сего ради Чертога Брачнаго вне затворитися имамы. Обаче не отрини чада твоя, тебе молящаяся, но, яко благосердая помощнице, облеку ны в ризы яже о вере крепости, препояши чресла наша чистотою во умерщвление страстей и обновление духа; паче же и души наша кротостию и смирением украси, да яко чада Божии, якоже агнцы и овчата Христовы невозбранно пройдем искушения нечестиваго мира сего, и вожделеннаго Чертога Райскаго да достигнем, идеже вся мудрыя девы Престолу Жениха Христа предстоят, воспевающе достопоклоняемое Имя Отца, и Сына, и Святаго Духа, ныне и в безконечныя веки. Аминь.

Молитва вторая

О богоблаженная святая первомученице, равноапостольная дево, Фекло прехвальная, истинная невесто Христова, красото тверди церковныя, мысленнаго Неба утренняя звезда, пресветлый бисере чистоты и целомудрия, сада райскаго благоуханный цвете!

Ты, паче всех благ и самая жизни единого Господа возлюбившая, добре за Имя Его пострадавшая, венцы девства, мученичества и апостольства предивно от Него увенчанная, ликом Небесным сопричтенная, аще и радуешися ныне во славе вечней, но не оставявши и нас, чтущих тя, яко неусыпную пред Богом ходатаицу и милосердную нашу предстательницу.

И якоже дарова тебе велию благодать Жених твой, сладчайший Иисус, смиренно молим тя: вонми прошением нашим сердечным, не остави нас в мире сем сирых; посети ны, в темнице греха сущия, на покаяние бодренное скоро возстави, души и тела научи блюсти чистоту, на путь доброделания направи, к евангельскому жительству усердие вдохни, молитвы огнь святой воспламени и возведи к любви Божественней.

Ей, добропобедная первострадальнице, понеже многая на пользу испросити можеша у Многомилостиваго Иисуса Спаса нашего, помощница скорая в сей жизни буди. Ангельское охранение нам исходатайствуй, раны и язвы болящих уврачуй, скорбящим благодатную отраду низпосли юность и отрочество чистотою огради, иноком в трудех и послушании пособствуй, супружества нерасторжима соблюди, воины во бранех неодолимы сотвори, враги же веры и Святыя Церкви расточи.

Пролей, нареченная избраннице Христова, моление твое за ны ко Господу, да дарует нам жития течение неукоризненно, старость неболезненну, безбедну, мирну; кончину же непостыдну, Таин Пресвятых, Тела и Крове Его Божественных, причастну, во еже Царствие Небесное нам улучити и с ченми Ангельскими тамо пребывати, и со святыми купно воспевати в Троице славимаго Бога, Отца, и Сына, и Святаго Духа, в безконечныя веки веков. Аминь.

Тропарь, глас 4

Словесем Павловым наушившимся, богоневестная Фекло/ и верою утвердившисья от Петра, богозванная,/ первомученица явилася еси и первострадальница в женах,/ возшла еси на пламень, яко на место благоцветущее,/ звери и юнцы устрашишася тебе, вооружися бо Крестом./ Тем моли всехвальная, Христа Бога, // спастися душам нашим.

Кондак, глас 8

Девства добротой просияла еси,/ и мученичества венцем украсилася еси,/ апостольству вверяешися, яко преславная;/ и огня убо пламень в росу преложила еси,/ юнца же ярость молитвою твоею укротила еси, // яко первострадальная.

Ин кондак, глас 2

Уязвивши твое сердце. добродеево. любовию Христовою,/ обручника временнаго, яко небрегома, преобидила еси,/ и на огонь дерзнула еси;/ зверей же уста заградила еси,/ и, спасшися от них, прилежаще, Павла ищущи, // Фекло первострадальная.

Величание

Величаем тя,/ страстотерпице Христова равноапостольная Фекло,/ и чтим болезни и труды твоя,/ имиже трудилася еси // во благовестии Христове.

Ин величание

Величаем тя,/ страстотерпице Христова равноапостольная Фекло,/ и чтим честная страдания твоя/ яже за Христа претерпела еси.